

Pemimpin Pembangkang Tidak Pertahan Kerusi Kerana Takut Ditolak - Abdullah Bernama
5 April, 2013

KEPALA BATAS, 5 April (Bernama) -- Tindakan beberapa pemimpin pembangkang termasuk penasihat DAP Lim Kit Siang untuk tidak mempertahankan kerusi pada Pilihan Raya Umum (PRU) ke-13 kerana bimbang ditolak oleh pengundi di kawasan mereka, kata bekas perdana menteri Tun Abdullah Ahmad Badawi.

Beliau berkata kecenderungan para pemimpin pembangkang melompat kerusi menunjukkan mereka gagal memberi khidmat kepada pengundi dan membawa pembangunan di kawasan yang diwakili mereka.

"Seandainya mereka ini aktif di kawasan seperti wakil-wakil rakyat Barisan Nasional (BN), sudah pasti akan terus pertahankan kerusi yang ada," katanya kepada pemberita selepas majlis penyerahan Program Baiki Rumah oleh Giat Mara di Pokok Jenerih, di sini hari ini.

Beliau berkata demikian ketika diminta mengulas keputusan Kit Siang, yang sebelum ini menyandang kerusi Parlimen Ipoh Timur, di Perak, mahu bertanding di Parlimen Gelang Patah di Johor.

Abdullah, yang juga Ahli Parlimen Kepala Batas, berkata rakyat perlu sedar tentang perkara itu dan membuat keputusan yang sewajarnya kerana pasti ada sebab mengapa pemimpin pembangkang enggan mempertahankan kerusi mereka.

Beliau meminta rakyat terus memberi mandat kepada kerajaan BN kerana terbukti mereka menjaga kebajikan rakyat menerusi pelbagai program transformasi.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=939971>